



Donacija Vlade Češke Republike općini Cazini



Izložba fotografija "Istanbul-the timeless city"



Mala škola pčelarstva u Cazihu



Uvodna riječ načelnika općine

Dragi sugradani,

Pred Vama se nalazi četvrti broj info biltena naše općine, kao jednog od vrlo uspješnih projekata koji smo

pokrenuli u cilju bolje informiranosti građana općine Cazin. U ovom broju naći ćete opis velikog broja novih projektnih ideja koje općina Cazin realizira u saradnji sa drugim ustanovama, ali i građanima naše lokalne zajednice. Izuzetno mi je drago što mogu najaviti još bogatije i interesantnije sadržaje na stranicama našeg biltena. Isto tako, koristim priliku da pozovem sve zainteresirane da se uključe u rad autorskog tima "Cazin info" i iznesu svoja stajališta, ideje i prijedloge u vezi sa bitnim informacijama i dešavanjima u općini Cazin.

USAID u općini Cazin

U oktobru 2009. godine općinski načelnik Nermin Ogrišević primio je u svom kabinetu direktora USAID-a u BiH gospodina Allana Reeda sa predstavnicima Projekta upravne odgovornosti GAP u Bosni i Hercegovini. USAID je jedan od donatora GAP projekta, što je gospodinu Reedu omogućilo da ujedno posjeti i nedavno otvoren Centar za pružanje usluga građanima u općini Cazin. Gospodin Reed nije krio pozitivne impresije viđenim, izrazivši zadovoljstvo zbog uspješno realiziranog projekta kojim je unaprijeđen kvalitet pružanja usluga.

Gospodin Reed je u razgovoru naglasio da je u Bosni i Hercegovini tek dva mjeseca, ali da je pozitivno iznenađen i impresioniran potencijalima kojima raspolaže naša zemlja, dodavši: "Nakon posjete nekoliko općina naročito sam impresioniran konstruktivnim ulogama vlasti na lokalnoj razini." Također je



naglasio da je jedan od ključnih elemenata razvoja lokalne zajednice jačanje nevladinog sektora.

Načelnik Ogrišević je ukratko predstavio općinu, podsjetivši da ova posjeta ukazuje na zadovoljstvo naših partnera u vezi sa uspostavljenom saradnjom na realizaciji dosadašnjih projekata. "USAID posjeduje kapacitete, mnogobrojne programe interesantne za našu općinu i mislim da se nama time otvara jedna perspektiva da kroz raznovrsne programe unaprijedimo stanje u našoj općini u konkretnim djelatnostima (poljoprivreda, poduzetništvo ili unapređenje rada administracije).

Sastanku je prisustvovao i gospodin Mario Vignjević, predstavnik Švedske agencije za koordinaciju međunarodnog razvoja (SIDA), kao jedne od donatora GAP projekta. On je iskoristio priliku da najavi nove projekte u saradnji sa partnerima iz USAID-a, koji su uveliko interesantni za općine, a posvećeni su unapređenju uslova života, kao i kvaliteta pružanja usluga na lokalnoj razini.





Predstavnici turskog bataljona EUFOR-a u Cazinu

Početkom nove godine, u kabinetu općinskog načelnika upriličen je prijem za predstavnike turskog bataljona u sastavu EUFOR-a BiH, na čelu sa majorom Bulentom Uslu, komandantom Službe za civilnu i vojnu saradnju kontingenta Turske armije u BiH.

Major Bulent izrazio je zadovoljstvo ovom posjetom, naglasivši da im je ovo prvi boravak na području USK-a. "Naša namjera jeste da upoznamo nove prijatelje, sklopimo nova poznanstva i uspostavimo prirodnu i historijsku vezu dva naroda i dvije države i nadamo se da će to rezultirati posjetom većeg broja naših sunarodnjaka ovom području", između ostalog rekao je major Bulent Uslu.

Načelnik OGREŠEVIĆ izrazio je nadu u početak jednog plodonosnijeg razdoblja u međusobnim odnosima, čime se nudi mnogo raznovrsnih opcija, od kojih će neke sigurno biti i realizirane i optimalno iskorištene.

Prioritetni razlog posjete ove delegacije jeste njihova namjera organiziranja kursa učenja turskog jezika u dvije ovdašnje osnovne škole, čime se Cazin priključuje grupi od skoro 20 općina u BiH u kojima je taj kurs već organiziran. Kao što su



gosti i naglasili, oni su ti koji pružaju svu materijalnu i tehničku podršku za organizaciju ovih aktivnosti, uz mogućnost i dodatne pomoći školama domaćinima. Naravno, kao slijedeći korak predviđeno je i povezivanje naših škola sa onima u Turskoj, a najuspješniji polaznici kursa će imati priliku da posjete ovu zemlju.

Općinski načelnik dao je punu podršku planiranim aktivnostima, kao i mogućim drugim vidovima saradnje, od susreta privrednika, povezivanja sa općinama u Turskoj, kulturne i sportske saradnje i sl. Ukratko, ovaj susret je protekao u jednoj srdačnoj atmosferi, punoj obostranog razumijevanja, kao i niza konkretnih i konstruktivnih prijedloga, čija bi se realizacija mogla očekivati u narednom periodu.

Položene svečane zakletve vjernosti u kabinetu načelnika

Svečanim činom polaganja zakletve u državnu službu pri Jedinstvenom općinskom organu uprave općine Cazin stupili su Jasna Samardžić, Emir Beširević i Eldin Sadiković. U Općinu Cazin stigao je i gospodin Selvedin Ahmetašević na upražnjeno radno mjesto pomoćnika načelnika Službe za imovinsko-pravne, geodetske i katastarske poslove. Ova služba pojačana je još jednim radnikom koji je zauzeo mjesto stručnog saradnika za katastar i geodetske poslove, a radi se o gospodinu Sadikoviću. Na mjesto pomoćnika načelnika Službe za stručne i zajedničke poslove stupila je gospođa Jasna Samardžić, a u Službu za urbanizam i zaštitu okoliša zaposlen je Emir Beširević kao viši stručni saradnik za urbanizam i prostorno planiranje. Proces popunjavanja ovih radnih mjesta traje već nekoliko godina, zbog otežane procedure Agencije za državnu službu FBiH, koja provodi konkursne procedure i u čijoj je isključivoj nadležnosti odlučivanje o vremenskim rokovima. S druge strane, konkurs je za pojedina radna mjesta raspisivan nekoliko puta, ali su, nažalost, bili neuspješni, jer nije bilo prijavljenih kandidata. Svečano polaganje zakletve označilo je konačno popunjavanje dvije pozicije pomoćnika načelnika koje su bile upražnjene punih pet godina.

Svečanu zakletvu vjernosti, za stupanje u državnu službu, položio je i dipl.ing.arh., gospodin Dževad Duraković. Ovim je Služba za razvoj i poduzetništvo dobila građevinskog inspektora, nakon dužeg perioda. Na konkurs za popunjavanje ovog radnog mjesta pune dvije godine se nije javljao niti jedan zainteresiran kandidat, što je otežavalo rad inspekcijских poslova u općini Cazin.

Zbog svih navedenih okolnosti, iznimno nam je drago što možemo poželjeti dobrodošlicu uspješnim kandidatima i sreću u njihovom budućem radu.



Uručene plakete cazinskim pčelarima

U cilju kontinuirane podrške pčelarima naše općine, načelnik Ogrješević je članovima Udruženja "Kesten" uručio plakete i zahvalnice za njihov doprinos u razvoju poljoprivrede, unapređenju i afirmaciji pčelarstva, promociji turizma, te uzgoju i preradi ljekovitog bilja. Pčelari naše općine pokazali su zavidno znanje i uspjeh na mnogim sajmovima i manifestacijama širom naše zemlje, ali i na internacionalnoj razini. Vrijedno i marljivo pripremaju programe i projekte za iduću godinu u čijoj će realizaciji učestvovati i Općina Cazin. "Ponosni smo na naše pčelare i njihov uspjeh. Njihov potencijal, znanje i marljivost treba da cijenimo, vrednujemo i pomognemo. U tu svrhu, Općina Cazin isplaćuje poticaje za pčelare i planira se uključiti u realizaciju programa posebne namjene koji se najavljuju iz Udruženja pčelara općine Cazin", riječi su načelnika Ogrješevića upućene našim nagradenim pčelarima.

Plaketu za doprinos razvoju poljoprivrede općine Cazin dobilo je Udruženje pčelara "Kesten", za unapređenje pčelarstva gospodin Sead Mesić, za uspješnu promociju općine u pčelarstvu, uzgoju i preradi ljekovitog bilja i promociji turizma plaketa je uručena gospodinu Šefiku Rošiću, koji je ujedno dobio i zahvalnicu za afirmaciju pčelarstva i rezultate postignute na manifestaciji 7. Bee Fest, sajam pčelarstva i pčelarske opreme. Zahvalnice po istom osnovu su uručene i Damiru Omanoviću, Ibrahimu Mahmutoviću i Mustafi Bašagiću. Plaketu za uspješno predstavljanje cazinskog pčelarstva na sajmu EKO BIS u Bihacu dobili su Ibrahim i Timka Bašagić, a Remziji Hodžić uručena je plaketa za uspješnu proizvodnju matica i matične mliječi.



Donacija Vlade Češke Republike općini Cazin

USK je jedan od prioritarnih regiona u okviru češke razvojne saradnje već duži niz godina, naročito kada je u pitanju zaštita životne okoline. U okviru jednog od takvih projekata, JKP "Čistoća" Cazin uručeno je vozilo za prikupljanje i transport otpada, u vrijednosti od 430.000,00 KM, kao donacija Vlade Češke Republike.

U tu svrhu, održan je prijem u kabinetu načelnika Ogrješevića, kome su, pored domaćina, prisustvovali i predsjedavajući Skupštine USK Admir Hadžipašić, direktor JKP "Čistoća" Said Samardžić i predsjednik Upravnog odbora ovog komunalnog preduzeća Muamer Mujić. Sastanku su, na poziv načelnika Ogrješevića, prisustvovali i gosti iz općine Bužim, predsjedavajući OV Agan Bunić i direktor JKP "KOMB", gospodin Ekrem Pehlić.

Razgovaralo se o projektu češke inostrane saradnje i mogućnostima isporuke tehnologije za uvođenje sistema integriranog upravljanja otpadom u USK. Između ostalog, istaknuta je potreba proširivanja saradnje u oblastima komunalne infrastrukture, kako bi se ovi projekti mogli kombinirati sa EU fondovima. U okviru ovog projekta već je izvršeno lociranje i sanacija određenog broja deponija na našem kantonu, a trenutno se radi na rješavanju pitanja regionalne deponije. Prema njihovim analizama, utvrđeno je da se ova deponija mora smjestiti na dvije lokacije za područje USK.

Češki Ambasador u BiH, Nj.E. Tomáš Szunyog, smatra da su ovakvi projekti korak naprijed ka unapređenju

sistema zaštite životne okoline, što je osnovno žarište interesovanja EU i ostalih međunarodnih subjekata, posebno stranih investitora. "Prisutni smo na ovom području već duže, a trudićemo se da saradnju proširimo i na ostala područja", riječi su ambasadora Szunyoga. Pokrenuta su i pitanja o mogućnostima kulturne saradnje kao osnove za nadogradnju u oblasti ekonomskih odnosa između BiH i Češke. Načelnik Ogrješević je istaknuo potrebu saradnje sa partnerima iz regiona, posebno kada su u pitanju EU fondovi. "Namjera nam je pokrenuti i saradnju sa privrednim subjektima, kako bi se nivelirao disbalans u bilateralnim odnosima između ovih zemalja u vezi sa uvozom roba iz Češke koji je trenutno četiri puta veći, nego u obrnutom slučaju", riječi su načelnika Ogrješevića.

Nj.E. na ovom sastanku pratili su predstavnici firme GEOTest BRNO i KOBIT, kao glavni implementatori ovog projekta u BiH.



Godišnjica V Korpusa ARBiH

U Cazinu je, 21.10.2009. godine, obilježena 17. godišnjica formiranja Petog korpusa Armije R BiH. Bila je to prilika za okupljanje pripadnika boračkih populacija, bivših saboraca, koji su na gradskom stadionu položili cvijeće, obilježavajući mjesto prvog postrojanja jedinica V Korpusa. Nakon toga je položeno cvijeće i proučena fatiha na centralnom šehidskom obilježju u Cazinu na kojem blizu hiljadu uklesanih imena svjedoči o velikim žrtvama za slobodu Bosne i Hercegovine.

Načelnik je, nakon čestitke povodom godišnjice V Korpusa, naglasio da se radi o jednom od najznačajnijih datuma naše historije kojeg ne smijemo zaboraviti. "Svima nam je cilj obezbijediti bolju budućnost, razvoj naše zemlje i bolje uslove života za svakog našeg građanina. Pozivam sve da nademo snage i definišemo minimalni zajednički sadržilac kao oni koji vole Bosnu Hercegovinu. Jedan od njih je da vodimo zajedno računa o sjećanju na značajne datume iz oslobodilačkog rata, da se sjećamo i ljudi i događaja, kao i naših jedinica, brigada, korpusa... Općina Cazin je uspjela da otrgne od zaborava ove



događaja čak i kroz Odluke OV-a o značajnim datumima i mislim da smo jedna od rijetkih općina koja je usvojila takav dokument. Naravno, pred nama su izazovi koje nosi budućnost, možemo se sjećati prošlosti, ali isto tako moramo se odgovorno odnositi prema budućnosti da ne bismo pokvarili ono što su nam ostavili naši prethodnici", rekao je načelnik Ogrješević.

Prisutnima su se obratili i profesor Alaga Topić, član ratnog predsjedništva Okruga Bihać, i komandant 503. sbb Muhamed Hamdo Delalić istaknuvši da: "Ma koliko često posjećivali ovo mjesto i ma koliko se sjećali i evocirali uspomene na ova 884 imena ispisana na spomen-oblježju, nedovoljno je za veličinu žrtve koju su oni dali. Danas je punih 17 godina od formiranja ovog najslavnijeg ratnog kolektiva u strukturi Armije BiH i čestitam svima ovaj svečani čin."


Općina Cazin u GAP-ovom Izvještaju “Projekat upravne odgovornosti GAP-faza II”

Ovo istraživanje predstavlja peto godišnje istraživanje mišljenja građana o pružanju općinskih usluga u općinama i gradovima BiH organizirano od strane GAP-a. Ove godine, istraživanje je provedeno u osamdeset općina i gradova (sedamdeset dvije partnerske općine i osam kontrolnih općina). Anketa je održana u periodu od 19. do 23. oktobra 2009. godine. Osamdeset anketara (po jedan u svakoj općini) anketiralo je preko 14.000 ispitanika.



U namjeri da se dobije osnova za reorganizaciju općinskih procedura u vezi sa unapređenjem općinskih usluga, u ovom izvještaju su dati i rezultati o mišljenju građana o pružanju općinskih usluga, stavu građana spram postojećih općinskih vlasti, kao i o mišljenju građana šta bi to trebalo da se uradi kako bi se unaprijedile općinske usluge za svaku partnersku i kontrolnu općinu po-naosob. Ovi podaci mogli bi da budu od pomoći općinskoj upravi i GAP-u u uspješnom pristupu za tehničku pomoć u reorganizaciji općinskih procedura.

Podaci koji se odnose na općinu Cazin su slijedeći:

ZADOVOLJSTVO GRAĐANA PRUŽANJEM OPĆINSKIH USLUGA



STAV GRAĐANA SPRAM OPĆINSKIH VLASTI



MIŠLJENJE GRAĐANA O TOME ŠTA TREBA URADITI U CILJU POBOLJŠANJA OPĆINSKIH USLUGA

Novo vatrogasno vozilo u općini Cazin

Vatrogasna jedinica općine Cazin 26.10.2009. godine opremljena je novim vozilom za gašenje požara vodom i pjenom. Vozilo je isporučeno u roku koji je predviđen ugovorom potpisanim u prošloj godini. U tu svrhu izvršena je smotra i postrojavanje Vatrogasne jedinice i upriličen svečani defile vozila ulicama našeg grada. Nabavku ovog vozila finansirala je Općina Cazin, a njegova cijena iznosi 432.043,20 KM, sa kapacitetom od 5.000 l vode i 500 l pjene.



riod i uspjeli smo obezbijediti neophodna sredstva. I u naredom periodu planiramo modernizirati i opremiti Vatrogasni dom i naše vatrogasce, kako bi svaka intervencija bila pravovremena i uspješna", riječi su načelnika Ogřeševića koji je izvršio smotru.

Ovo je prvo vozilo ovakve kvalitete na prostoru našeg kantona, a jedno je i od rijetkih u Federaciji BiH. "Drago nam je što smo bili u mogućnosti nabaviti visokokvalitetno vozilo za prevenciju i spašavanje naših sugrađana i njihove imovine od požara. Njegovu kupovinu smo planirali duži pe-

Veliki trud u realizaciji cjelokupnog projekta imala je i Služba za civilnu i protivpožarnu zaštitu naše općine, u čijem sastavu se nalazi Vatrogasna jedinica, na čelu sa profesorom Saidom Mujićem. Ne krijući zadovoljstvo zbog ovog događaja, gospodin Mujić je zahvalio predstavnicima firme Ziegler iz Zagreba na uspješnoj realizaciji ugovora i saradnji koju su ostvarili u proteklom periodu sa našom općinom.

Ostrožac na poštanskim markicama BH Pošte

Na osnovu prijedloga Službe za opću upravu i društvene djelatnosti općine Cazin za izdavanje poštanske marke sa motivom starog grada Ostrožca na temu: "Ugroženo graditeljsko naslijeđe BiH - stari grad Ostrožac sa zamkom viteza Lotara Von Berkosa (13. st.)", isti je uvršten u Program prigodnih poštanskih maraka BH Pošte, sa planiranim datumom izdanja za 22.03.2010. godine.

Izdanje će se objaviti na prigodnoj poštanskoj marci, FDC-kovrti prvog dana, prigodnom žigu, te biltenu, a koji će se kao takvi pojaviti i u druge promotivno-propagandne svrhe (filatelističke izložbe, filatelistički časopisi i katalogi u zemlji i inostranstvu, plakati sa

filatelističkim izdanjima i sl.).

U skladu sa zakonskim obavezama u ovom predmetu, Služba marketinga BH Pošte pribaviće potrebne saglasnosti na ime realizacije planiranog izdanja od Zavoda za zaštitu spomenika BiH iz čijeg je domena predmetno izdanje.

Za izradu likovnog rješenja za motiv prigodne poštanske marke povodom ovog izdanja JP BiH Pošta d.o.o. Sarajevo angažovaće adekvatnog likovnog umjetnika, zaposlenog u Službi marketinga, Odjeljenju BH marke i grafičkog dizajna.



Radni sastanak u kabinetu načelnika općine

Sredinom januara 2010. godine u Općini Cazin održan je koordinacijski sastanak pomoćnika načelnika za opću upravu i društvene djelatnosti USK sa matičarima koji se nalaze u lancu razmjene biometrijskih podataka. Na sastanku su bili prisutni predstavnici svih općina našeg kantona, izuzimajući općinu Ključ. Cilj ovog sastanka je bila koordinacija iskustava u vezi sa stanjem u oblasti građanskih prava, sa naglaskom na matične knjige i evidencije o državljanima. Problem u radu ovih službi predstavlja Zakon o državljanstvu BiH i FBiH, jer su obavezama iz Mape puta za liberalizaciju viznog režima određene dužnosti pale na teret organa uprave u općinama i njihovih nadležnih službi. Različiti pristup u izdavanju uvjerenja koja se odnose na evidenciju državljana, odraz je nedovoljne podzakonske regulative u oblasti državljanstava.

Neadekvatan odnos prema rješavanju ovog pitanja sa viših nivoa pokazuje i činjenica da se na ovom sastanku nije pojavio niko iz MUP-a USK, iako su bili blagovremeno obaviješteni i pozvani.

Prema riječima prisutnih, sastanak je bio izuzetno koristan zbog čega bi trebalo da se uspostavi kontinuirana praksa međusobne razmjene informacija i praktične saradnje.



Rezultati studije politike stipendiranja u BiH

Na osnovu projekta analize CCI (Centri civilnih inicijativa) o strategijama stipendiranja općina u BiH, Cazin se našao na visokom 19. mjestu od ukupno 122 općine tretirane u ovom dokumentu. Rang-lista je kreirana na osnovu tri kriterija: ukupnog broja stipendista, ukupnih izdvajanja za stipendije i procentualnih izdvajanja za stipendije u odnosu na ukupni budžet općine. Ova analiza predstavlja težnju nevladinog sektora da utječe na politike planiranja i realizacije stipendiranja učenika na lokalnom nivou, ujedno čineći dobru platformu za uspješno unapređenje i razvoj istih.

Fokus ove studije jeste nesistematičnost i nedostatak strateškog pristupa u BiH kod ulaganja u najvažniji faktor ekonomskog razvoja današnjice – ljudski kapital. Prema podacima CCI, postoji niz anomalija prilikom stipendiranja učenika i studenata, krećući od dokumentacije koja često ne mora biti potpuno validna, visine stipendije koja nije dostatna za ovu populaciju, procedure konkursa su preduge i neefikasne i sl. Međutim, treba napomenuti da su ostvarena i određena kumulativna unapređenja u odnosu na prethodni period (ukupna izdvajanja za stipendije u 2009. godini porasla su za 59% u odnosu na 2008. godinu, a 116% u odnosu na 2007. godinu).

Općina Cazin je, shodno rezultatima ove analize, 14. po redu kada su u pitanju iznosi izdvajanja, a 10. po broju dodijeljenih stipendija.

U 2009. godini Općina Cazin dodijelila je 187 stipendija za studente i 171 stipendiju za učenike, a ukupan iznos izdvojenih sredstava za ovu namjenu u budžetu iznosio je 200.000,00 KM.

Državno prvenstvo invalidnih lica u malom nogometu

Oktober 2009. godine u općini Cazin protekao je u duhu sporta. Sedam ekipa iz Bihaća, Cazina, Tuzle, Lukavca, Zenice, Goražda i Travnika odmjerilo je snage na 12. po redu državnom prvenstvu invalidnih lica u malom nogometu. Prisutne je u ime domaćina pozdravio predsjednik Sportskog saveza Emir Dautović, a predsjedavajući Skupštine USK Admir Hadžipašić proglasio je prvenstvo otvorenim.

Učesnici ovog prvenstva su sa svojim delegacijama položili cvijeće na centralno šehidsko spomenobilježje i proučili fatihu pred duše umrlih.

Nakon toga je upriličen svečani prijem u kabinetu načelnika općine. Gospodin Ogrješević je srdačno primio goste i razgovarao s njima o svim problemima sa kojima se susreću u ovom sportu i pružio im svoju neizmjernu podršku.

Titulu pobjednika ovog prvenstva osvojila je ekipa domaćina, pobjedom nad rivalima iz Zenice, rezultatom 4:2.



Stolni tenis i mali nogomet u SSRI

U kabinetu načelnika Ogrješevića 13.11.2009. godine održan je prijem za ekipe državnih prvaka u stolnom tenisu i malom nogometu. Riječ je o timovima Saveza za sport i rekreaciju invalida koji već duži niz godina ostvaruju zapažene rezultate u pojedinačnim i ekipnim sportovima.

Sastanak je upriličen s ciljem upoznavanja sa stanjem u oblasti sporta na svim nivoima, posebno kada su u pitanju invalidna lica. "Naš cilj i naša obaveza je pomagati i ulagati u sportske kolektive, kako bi ostvarene rezultate podigli na višu razinu i obezbijedili učešće naših sportista na elitnim međunarodnim takmičenjima. Važnost ovog sporta



se ogleda u socijalizaciji i rekreaciji osoba kojima je potrebna naša pomoć, ukoliko želimo biti društveno odgovorna zajednica", riječi su načelnika Ogrješevića koje je uputio prisutnima.

"Savez za sport i rekreaciju invalida ispunio je sve planirane aktivnosti za ovu godinu, što će se, uz dodatni angažman, nastaviti i u narednom periodu. Posebno je važno istaknuti uključivanje djece sa posebnim potrebama i civilnih invalida u planove i programe sportskih aktivnosti za ovu godinu", istaknuo je Emir Dautović, predsjednik Saveza za sport i rekreaciju invalida općine Cazin.



Bajramski turnir okupio karatiste u Cazinu



Gradska dvorana u Cazinu, krajem novembra 2009. godine, bila je mjesto okupljanja preko dvije stotine takmičara otvorenog karate prvenstva USK-a, odnosno Bajramskog turnira za djecu, kadete i juniore "Cazin 2009". Domaćin i organizator ovog takmičenja je KK "Cazin".

Kao i u velikom broju ovakvih i sličnih takmičenja, pokrovitelji su bili SS općine Cazin, kao i sama općina. Otvarajući prvenstvo, načelnik je još jednom potvrdio dosadašnju opredijeljenost Općine da ulaže u razvoj

sporta i nastojanja da se sportski rezultati adekvatno nagrade i valoriziraju.

Takmičenje je okupilo čak 15 ekipa, ne samo sa područja USK-a i BiH, nego i nekoliko ekipa iz Republike Hrvatske: KK "Cazin" i KK "Krajina" iz Cazina, KK "Bihać", KK "Delta" i KK "Sensei" iz Bihaća, KK "Bužim", KK "Feniks" i KK "Una" iz Bos. Krupe, KK "Saniteks" Velika Kladuša, KK "Energija", KK "Sindelić" i KK "Student" iz Banje Luke, KK "Obilić" Dubica, KK "Kaplast" Karlovac i KK "Zamet" Rijeka.

Izbor sportiste općine Cazin za 2009.godinu

U Domu kulture 03.02.2010.godine održan je izbor najboljih i najuspješnijih sportista i sportskih kolektiva 2009.godine na području općine Cazin. Ovaj izbor se iz godine u godinu profilira u jednu od najvećih i najznačajnijih manifestacija u organizaciji Sportskog saveza i općine. Ove godine veliki broj zvanica, posjetilaca i građana općine Cazin svojim su prisustvom uveličali ovaj događaj i potvrdili epitet Cazina kao izuzetno uspješne sportske sredine.

Na samom početku manifestacije Plakete za doprinos razvoju sporta dodijeljene su načelniku Ogrješeviću, Sportskom savezu USK, preduzećima I-Crni d.o.o. i Ingplast d.o.o.

U uvodnom obraćanju, načelnik Ogrješević je istaknuo značaj sporta za općinu Cazin i njenu budućnost. "Nije slučajno da smo u prošloj godini izdvojili preko pola miliona KM u sport i sportske manifestacije. Prepoznali smo važnost sporta u životima naših sugrađana, djece koja ostvaruju zavidne rezultate i njihovih roditelja koji s ponosom ulažu u njihov napredak. Spadamo u vrh liste općina koje aktivno brinu o razvoju sporta i sistematski rade na njegovoj promociji", izjavio je načelnik Ogrješević.

Pehari za uspješne sportske rezultate dodijeljeni su u 14 ekipnih i pojedinačnih kategorija. Za sportistu 2009.godine izabran je Abdagić Isak u kategoriji loptačkih sportova, nakon što je ostvario najbolje rezultate u juniorskoj i seniorskoj ekipi takmičara. U kategoriji borilačkih sportova najbolji sportista je Hrnjica Adnan. Za najbolju sportistkinju u kategoriji loptačkih sportova izabrana je Kličić Jasmina, članica ŽRK "Krajina". Najbolje kolektivne rezultate u 2009.godini ostvarile su ekipe ŽRK "Krajina" i "TOP Stens 73".

Manifestaciju izbora sportiste godine upotpunili su kulturno-zabavnim programom članovi novoformiranog gradskog ansambla, sportski klub "Enigma" i KK "Cazin".



Liskovac dobio novi put

U nedjelju, 12.10.2009. godine, svečano je ozvaničen uspješan završetak značajnog projekta, ne samo za MZ Liskovac, nego i šire. Naime, otvaranjem puta Sinanovići u MZ Liskovac konačno su povezane MZ Liskovac i Pećigrad, čime je završen i putni prsten spajanja ovog područja.



Prema riječima Nijaza Sinanovića, predsjednika građevinskog odbora, sa realizacijom ovog projekta počelo se još 2004. godine, ali zbog obimnosti i nedostatka finansijskih sredstava, projekat nije bilo moguće realizirati na vrijeme. "Ukupna dužina puta je 1.950 m, širina 5 m, a prvi dio je završen 2007. godine, dok posljednju dionicu, evo, završavamo u 2009. godini. Ukupna vrijednost projekta je 400.000,00 KM, od čega su građani uložili oko 160.000,00 KM, a preostali iznos Općina Cazin", riječi su gospodina Sinanovića.

Općinski načelnik je, zahvaljujući zalaganju mještana, istaknuo: "Pojeekat je po rangu lokalni, ali po obimu je od izuzetne važnosti za cijelu općinu Cazin. U ovoj MZ se i u narednom periodu očekuju značajni projekti, o čemu govori i veliki broj inicijativa naših građana koje predstavljaju dodatni podsticaj da i dalje nastavimo zajednički graditi našu lokalnu zajednicu".



Godina 2010 / Februar / Broj 4



Novi putni pravac u MZ Miostrah

Hladno vrijeme praćeno padavinama nije spriječilo okupljanje mještana naselja Brdo u MZ Miostrah, niti umanjilo njihovu radost završetkom jednog značajnog infrastrukturnog projekta. Naime, svečano je pušten u promet novoasfaltirani putni pravac, čija je ukupna dužina 1.750 m i vrijednost od preko 260.000,00 KM. Mještani su u ovaj projekat uložili 113.000,00 KM, a ostatak općina Cazin putem Komunalno-stambenog fonda. Prema riječima zastupnika u Skupštini USK-a i člana Savjeta MZ Miostrah g. Muje Beganovića, akcija na realizaciji ovog putnog pravca koji povezuje naselje Brdo sa preostalim dijelovima MZ trajala je preko dvije godine. "Ovo je najveći infrastrukturni projekat u 2009. godini na području MZ Miostrah sa kojim smo praktično došli do 80% pokrivenosti asfaltnom putnom mrežom, dok su za većinu preostalih putnih pravaca urađeni pripremni i zemljani radovi, tako da njihov završetak očekujemo u narednoj godini", istaknuo je gospodin Beganović.

Općinski načelnik je naglasio: "Imali smo uspješnu godinu kako u ovoj MZ, tako i na području cijele općine". "S obzirom na to da smo već okrenuti planovima za narednu godinu, nadam se da ćemo uz podršku jednih drugima realizirati zacrtane ciljeve", riječi su gospodina Ogrješevića.

I naselje Osmanagići dobilo novi put

Na području MZ Cazin, u naselju Osmanagići, otvorena je novoasfaltirana dionica puta u dužini od 220 m. Vrijednost projekta iznosi oko 40.000,00 KM, koje su zajednički realizirali mještani ovog



naselja i JU "Komunalno-stambeni fond". Kiša nije omela radost mještana, koji su, prema njihovim riječima, završetkom projekta još bliži svojoj "čaršiji". Završetak ovog puta označio je i dodatnu urbanizaciju ovog naselja.

"Uporedo sa ovim projektom izvršena je, u saradnji sa Elektrodistribucijom, i rekonstrukcija niskonaponske mreže ovog naselja, a u narednom periodu je planirana i rasvjeta", riječi su načelnika općine Nermina Ogrješevića.

Prema riječima općinskog načelnika, i pored toga što je krizna godina, nije se izgubilo na dinamici realizacije planiranih projekata, a najavljen je i početak velikih kapitalnih investicija naredne godine.

Novoasfaltirani putevi u općini Cazin

Bajramski praznici u nekoliko naselja naše općine bili su obilježeni i završetkom važnih infrastrukturnih projekata.

Naime, u MZ Tržačka Raštela, u naselju Rekići, pušten je u funkciju lokalni put dužine 311 m. Posebnost projekta, koji je započet 2007. godine, ogleda se i u malom broju domaćinstava koji su ga pokrenuli i učestvovali u njegovoj realizaciji. Ukupna vrijednost projekta je oko 46.000,00 KM, od čega su samo tri domaćinstva izdvojila 18.000,00 KM, a ostatak je uložila Općina Cazin, odnosno JU "Komunalno-stambeni fond".

S druge strane, u MZ Stijena, naselju Vilenjača, otvorena su četiri kraća putna pravca ukupne dužine 750 m i vrijednosti blizu 120.000,00 KM.

Ovi projekti znače još jedan korak naprijed



ka urbanizaciji naše općine. Prema riječima općinskog načelnika, opravdane su težnje našeg stanovništva da poboljšaju uslove života u mjestima svoga boravka i dodao: "Naša je obaveza odgovoriti na ovakve inicijative građana i zato možemo reći da je i ova godina bila uspješna kada je u pitanju izgradnja putne infrastrukture, a naše su aktivnosti sve više usmjerene na pripremu slijedećeg kapitalnog projekta - kanalizacionog sistema za područje cijele općine."

Otvor puta u MZ Polje

Dana 04.10.2009. godine, u MZ Polje, u zaseoku Ikanovići, otvoren je asfaltirani put dužine 330 m. Ukupna investicija puta iznosila je 49.000 KM, a finansiran je uz 50% učešća od strane mještana i 50% od strane Općine Cazin. Putna infrastruktura za mještane ovakvih naselja od primarnog je značaja, što se može vidjeti i na osnovu pojedinačnih izdvajanja za ove projekte. Najveći iznos uplatio je gospodin Jusuf Ikanović, nesebično ulažući 5.000,00 KM kako bi se završio put u njegovom rodnom selu.

Prema riječima predsjednika građevinskog odbora gospodina Ismeta Ikanovića, putevi su ulazna karta za bolju budućnost, nešto čime dajemo svoj doprinos razvoju lokalne zajednice.



Nova cesta u Porčičima i Gnjilavcu

Svečano je ozvaničen uspješan završetak asfaltiranja puta u naselju Porčiči u MZ Krivaja, u ukupnoj dužini od 1.004 m. Na području naše općine postoji nekoliko MZ koje imaju asfaltirane sve putne pravce, a MZ Krivaja je na putu da postane jedna od njih.

Gospodin Munir Porčić, predsjednik građevinskog odbora, zahvalio je Općini Cazin i svim mještanima koji su učestvovali u ovom projektu. "Ovo je veliki dan i velika radost za naš kraj. Ukupna vrijednost projekta je 120 hiljada KM, od čega su mještani uložili oko 54 hiljade KM, a preostali iznos Općina Cazin", istaknuo je gospodin Porčić.

Općinski načelnik je zahvalio mještanima na uspješnoj akciji i naglasio da "nastavljamo ustaljenim ritmom kada su u pitanju infrastrukturni projekti. U jednom od planova sebi smo zacrtali da treba da završimo sve značajnije putne pravce na teritoriji naše općine. Naravno, bitno je naglasiti važnost učešća građana, mještana koji žive i koji su naslonjeni na ovaj putni pravac. Zbog njih smo podržali realizaciju ovog projekta i to ćemo činiti i ubuduće", riječi su načelnika Ogřeševića.

U subotu, 09.11.2009. godine, otvoren je novoizgrađeni put u naselju Topići, koje pripada MZ Gnjilavac. U realizaciju ovog puta utrošeno je 80.000,00 KM, a mještani su svoj doprinos dali u iznosu od 26.000,00 KM, dok je preostali iznos obezbijedila Općina Cazin i JU "Komunalno-stambeni fond". Uz izgradnju ovog puta, u dužini od 221 metar, urađen je i kanalizacijski sistem i nova vodovodna i elektromreža.

Zvršetak projekta je korak naprijed ka urbanizaciji naselja Topići, koje nakon prostorno planske dokumentacije i fizički postaje dio urbanog prostora općine Cazin. Put su, uz prisustvo velikog broja mještana, otvorili načelnik Ogřešević i predsjednik građevinskog odbora Fadil Delalić.



Operativni plan GOV-WADE

Općina Cazin se u 2008. godini pridružila Projektu dobre uprave u oblasti voda i okolišne sanitacije GOV WADE, koji se provodi pod pokroviteljstvom Švicarske agencije za razvoj i saradnju SDC-a, te uz fasilitaciju Udruženja Una-Sana. Jedan od aspekata ovog projekta je i zajedničko finansiranje prioriternih projekata i aktivnosti koji su definirani Operativnim planom. Sporazumom je definirano za 2009. godinu da svaka strana uloži po 100.000,00 KM u realizaciju operativnog plana, tako da bi ukupno bilo implementirano 200.000,00 KM.

Zbog nefunkcionalnosti OV-a implementacija ovih

sredstava bila je upitna, jer je osnovni princip SDC-a aktivno učešće lokalnih vlasti, a time i OV-a. S obzirom na to da je Općina Cazin, i pored problema nefunkcionisanja OV-a, ušla u implemetaciju ovog projekta i pokazala da i bez OV-a može određene aktivnosti provoditi na veoma učinkovitoj razini, SDC je odobrio implementaciju predviđenih sredstava za 2009. godinu.

Dana 15.12.2009. godine, općina Cazin je okončala sve aktivnosti predviđene operativnim planom za predmetnu godinu, a finansijska realizacija iznosi oko 99% predloženih sredstava za implementaciju.

U okviru operativnog plana realizirane su ativnosti po slijedećim oblastima:

1. Vodospabdijevanje

Operativnim planom u ovoj oblasti podržano je stavljanje u funkciju još jednog cazinskog izvorišta - Pajića potok, koje se nalazi u neposrednoj blizini Cazina. Ovo izvorište kapaciteta 10 ltr/sec, ubuduće će snabdijevati gradane naselja Mala Lisa, Seferagići, Bašagići, Karaula i Osmanagići. U okviru implementacije operativnog plana za 2009. podržane su slijedeće aktivnosti:

- Nabavka pumpnog agregata za izvorište Pajića potok
- Nabavka i montaža opreme za telemetrijski sistem izvorišta Pajića potok

Iz zajedničkih sredstava za realizaciju ovih aktivnosti utrošeno je ukupno 18.000,00 KM.

2. Otpadne vode

U oblasti zbrinjavanja otpadnih voda realizirano je više aktivnosti kroz implementaciju operativnog plana. Ove aktivnosti mogli bismo podijeliti u dvije grupe: aktivnosti na izradi projektne dokumentacije i aktivnosti na izgradnji kanalizacionog sistema. Kad je u pitanju izrada projektne dokumentacije, uloženo je 49.350 KM na izradi slijedeće projektne dokumentacije:

- Izrada glavnog projekta sekundarnog kanalizacionog kolektora za područje zaštitne zone izvorišta Mutnik
- Izrada glavnog projekta gradskog kanalizacionog ko-

lektora naselja Gnjilavac – Alinac
- Glavni projekat za izmjenu trase glavnog fekalnog kolektora

Što se tiče izgradnje kanalizacionih sistema, ukupno je implementirano 78.000 KM, a radi se o projektu izgradnje gradskog kanalizacionog kolektora naselja Gnjilavac – Alinac u ukupnoj dužini od oko 500 m.

3. Odrbana od voda i oborinske vode

U oblasti odbrana od voda i oborinskih voda, zajedničkim sredstvima finansirana je izrada glavnog projekta regulacije Čajinog potoka na području regulacionog plana Slatinske bare, s ciljem međusobnog usklađivanja trasa regulacije i budućeg glavnog fekalnog kolektora kanalizacionog sistema. U implementaciju ove aktivnosti uloženo je cca 12.200 KM.

4. Lokalna uprava

Jedan od uslova sporazuma o zajedničkom finansiranju operativnog plana jeste i ulaganje u poboljšanje upravljačkih kapaciteta općinske administracije, tzv. softvera u oblasti voda i zaštite okoliša. U tu svrhu operativnim planom provedeno je niz aktivnosti kojima su u značajnoj mjeri unaprijeđeni uslovi rada službenika koji rade u ovoj oblasti, ali i niz drugih aktivnosti koje imaju za cilj promociju općine kao ekološki osviještene sredine:

- Opremanje ureda sektora za vode i zaštitu okoliša unutar Službe za urbanizam i zaštitu okoliša, te nabavka softvera za geoinformacioni sistem voda u ovom sektoru.

Ukupno investirano operativnim planom 22.400 KM
- Obilježavanje Dana rijeke Une, koje je provedeno pod pokroviteljstvom općina Cazin i Bihać, a u organizaciji Ekološke koalicije unskog sliva EKUS

- Operativnim planom je sufinansirana ova aktivnost iznosom od 1.450,00 KM

- Podrška izdavanju ekološkog časopisa Kontakt, kojeg uređuju stručnjaci iz oblasti zaštite okoliša a kojeg izdaje EKUS. Ova aktivnost je u 2009. podržana sa iznosom od 2.000,00 KM

- Prekogranična saradnja sa općinama i gradovima u susjednoj Republici Hrvatskoj: Slunj, Rakovica i Plitvička jezera u okviru poziva za prekograničnu saradnju u okviru IPA fondova rezultirala je izradom aplikacije "Zaštita okoliša i vodnih resursa prekograničnog područja duž rijeke Korane". Ova aktivnost je operativnim planom finansirana u iznosu od 6.400,00 KM

- Opremanje radnika JKP "Čistoća" neophodnom HTZ opremom finansirano je sa 6.000,00 KM

- Izrada općinske stranice o GOVWADE projektu na kojoj će se prezentirati svi sadržaji i aktivnosti koji će se ubuduće realizirati kroz ovaj projekat i druge projekte u oblasti voda i zaštite okoliša. Vrijednost ove aktivnosti je 2.000,00 KM.



Prema riječima predsjednika Skupštine ovog udruženja, gospodina Seada Mesića, članovi Udruženja su iznimno zadovoljni odazivom polaznika, ali i podrškom koju su ovom projektu pružili Općina Cazin i općinski načelnik.

Mala škola pčelarstva u Cazinu

Na početku nove godine u Cazinu je otvorena škola pčelarstva za 25 polaznika u organizaciji Udruženja pčelara "Kesten". Škola se sastoji od 110 sati teoretske i praktične nastave koju izvode certificirani predavači u oblasti pčelarstva i proizvodnje meda. Nakon uspješnog završetka obuke, polaznicima će biti uručena uvjerenja koja garantuju njihovu osposobljenost za znanja pčelara, a općina Cazin i Udruženje će im kao nagradu dodijeliti po tri košnice. Svaki od polaznika će također imati priliku da u toku cijele godine obavlja pčelarske poslove u saradnji sa dodijeljenim mentorom.



"Važno je naglasiti da su cazinski pčelari opravdali povjerenje koje im je ukazala naša općina, ali i da su im se isplatili dugogodišnji trud i zalaganje. Drago mi je da se ovim projektom nastavlja uspješna saradnja Općine i Udruženja pčelara, zbog čega ćemo i ubuduće pružati podršku njihovom radu. To znači da ćemo i ove godine izdvajati poticaje za pčelare, ali i određena sredstva za njihove mnogobrojne projekte. Naglasio bih da je, pored ovog projekta, Općina Cazin pružila podršku i projektu brendiranja kestenovog meda, čime se nadamo većoj prepoznatljivosti i konkurentnosti na tržištima van naših područja", istaknuo je načelnik Ogřešević.



“Eko-šampinjon” u Cazinu

U Mjesnoj zajednici Mutnik 05.12.2009. godine svečano je otvoren najsavremeniji pogon za proizvodnju šampinjona u Bosni i Hercegovini, pod nazivom “Šampinjon” u vlasništvu Kasima Samardžića.

Svečanom otvorenju ovog proizvodnog pogona prisustvovali su načelnik općine Cazin gospodin Nermin Ogrješević, direktor IFAD-a gospodin Halil Omanović, direktor Poljoprivrednog zavoda USK magistar Smail Toromanović, te proizvođači šampinjona i članovi zadruge “Eko-šampinjon”. Specijalizirana otkupna proizvodno-prerađivačka zadruga “Eko-šampinjon” registrirana je na inicijativu članova općinskog udruženja proizvođača gljiva. “Eko-šampinjon” je prva zadruga ovakvog tipa u BiH, a za sada je okupila četiri proizvođača, koliko ih trenutno ima u općini Cazin.

Inicijator osnivanja zadruge je dugogodišnji cazinski uzgajivač gljiva Huse Ružnić, koji kaže da je ideja o formiranju zadruge došla zbog velike potražnje na lokalnom tržištu. Dnevne potrebe za gljivama u općini Cazin su oko 700 kilograma, a četiri proizvođača u prosjeku dnevno proizvedu oko 500 kilograma, što nije dovoljno za izmirenje os-



novnih potreba.

Osnivači ove zadruge najavljuju i mogućnost kooperantske saradnje sa više od 50 potencijalnih proizvođača gljiva. Pomoć u realizaciji zadataka obećao je i Poljoprivredni zavod USK.

Načelnik općine podržao je projekat osnivanja ove zadruge, uz napomenu da se samo na ovakvom sistematskom pristupu može graditi sveukupan razvoj naše lokalne zajednice. “Pokretanje proizvodnje znači i nova radna mjesta, a to je prvenstveni cilj svake sredine koja intenzivno radi na razvoju i podizanju kvaliteta životnog standarda svih njenih mještana”, riječi su načelnika Ogrješevića.



Općinski razvojni tim

Početkom decembra 2009. godine u zgradi Općine Cazin održana je inicijalna sjednica općinskog razvojnog tima formiranog od strane općinskog načelnika za praćenje procesa planiranja. Razvojni tim predstavlja operativno, izvršno i koordinaciono tijelo zaduženo za vođenje procesa planiranja na općinskom nivou, a koje ujedno predstavlja i komunikacijsku vezu sa drugim općinskim tijelima.

Cilj održanog sastanka jeste mapiranje i analiza zainteresovanih aktera, kao i definisanje akcionog plana za mobilisanje zajednice i uspostavljanje adekvatnih kanala komunikacije. Projekat integrisanog lokalnog razvoja je zajednička inicijativa SDC-a, UNDP-a, koja se provodi u partnerstvu sa Ministarstvom za ljudska prava i izbjeglice BiH, Ministarstvom uprave i lokalne samouprave RS, Federalnim ministarstvom pravde i oba entitetska saveza općina i gradova.

Općina Cazin u ovom projektu ima status pridružene općine, koja je prepoznata kao primjer organiziranja odgovarajućih administrativnih struktura potrebnih za djelotvorno odgovaranje razvojnim trendovima i izazovima. Općine sa ovim statusom bi sa relativno ograničenom spoljnom podrškom i ciljanim jačanjem kapaciteta za primjenu standardizirane metodologije u planiranju lokalnog razvoja mogle predstavljati uzoran primjer drugim općinama u primjeni integriranog i participatornog pristupa planiranju lokalnog razvoja. Memorandum o razumijevanju između općine Cazin i UNDP-a potpisan je u aprilu 2009. godine, što je rezultiralo sveobuhvatnom procjenom kapaciteta za planiranje i upravljanje lokalnim razvojem, osiguravajući na taj način uvid u sadašnje stanje kada su u pitanju kapaciteti općinske uprave i njenih partnera u planiranju i upravljanju lokalnim razvojem. Na bazi tih rezultata definisan je nivo podrške koju će Općina i njeni partneri dobiti kroz treninge i tehničku podršku.

Općina Cazin u finalnoj fazi projekta "GOV-WADE"

Početkom februara 2010. godine, načelnik općine Cazin i njegovi saradnici održali su sastanak sa predstavnicima Švicarske agencije za razvoj i saradnju (SDC). Učesnici ovog sastanka bili su i predstavnici političkih partija koje participiraju u Općinskom vijeću i direktor Una Consultinga, gospodin Sandi Zulić, kao jedan od partnera u ovom projektu. Cilj sastanka bilo je upoznavanje sa tehničkim pripremama u vezi sa potpisivanjem Memoranduma o razumijevanju između SDC-a, Una Consultinga i šest općina koje su dobile preporuku za uključanje u ovaj projekat (Bihać, Bosanska Krupa, Bosanski Novi, Cazin, Sanski Most i Prijedor). Ove općine će implementirati završnu fazu Projekta dobre uprave u oblasti voda i zaštite okoliša na području sliva rijeke Une.



Iako je povod za ovaj sastanak bila tehnička priprema u vezi sa potpisivanjem Memoranduma, glavni razlog jeste razgovor o formiranju općinskog vijeća koje ima presudnu ulogu u realizaciji ovakvih projekata.

Naime, iako je za implementaciju ovakvih projekata neophodna saglasnost OV, Cazinu je pružena mogućnost da se uključi u finalnu fazu GOV-WADE projekta zbog svog aktivnog rada, angažmana i izgradnje kapaciteta. SDC je prepoznao napore općine Cazin da provede sve neophodne reforme, zbog čega je Thomas Rüegg, direktor Ureda švicarske saradnje za BiH, okarakterisao Cazin kao "ogledni primjerak za susjedne općine i uzor napretka koji bi u budućnosti trebalo da se replicira na druge sredine u BiH". Međutim, kako bi ovaj projekat doživio potpuno pozitivnu reputaciju, neophodna mu je podrška OV Cazin. "Ne kažem da treba da slijedite švicarski model u rješavanju svojih političkih problema, ali smatram da hitno treba da pronađete svoj vlastiti model", istaknuo je gospodin Rüegg. Načelnik Ogršević naglasio je važnost saradnje sa stranim partnerima, posebno kada su u pitanju pro-

jekti kojima se izgrađuju infrastrukturni i ljudski kapaciteti za napredak i poboljšanje uslova života građana općine Cazin. "Važno je znati da krivicu za nefunkcionisanje OV snosimo svi zajedno i da ćemo u budućnosti biti orijentisani na rješenje, a ne na problem ovakve situacije. Također smatram vrlo važnom tešku odluku SDC-a da općinu Cazin uključi u ovaj projekat bez formalno-pravne podrške OV, jer time pokazujemo spremnost za rad i realizaciju obećanih i planiranih aktivnosti naše administracije", rekao je gospodin Ogršević.

Sastanku je prisustvovao gospodin Karl Wehrle, konsultant Una-Sana udruženja i supervizor SDC-a za projekat GOV-WADE u BiH, koji nije krio svoje oduševljenje rezultatima tima za implementaciju projekta. Prema njegovom mišljenju, općina Cazin će biti primjer koji će slijediti ostale općine i gradovi u BiH. "Jedino je ova općina dobila podršku SDC bez saglasnosti OV i to sigurno govori o kvaliteti urađenog posla i veličini uloženog truda", riječi su gospodina Wehrlea.

Memorandum o razumijevanju, kojim se regulišu zadaci finalne faze ovog projekta, potpisan je 04.02.2010. godine u općini Sanski Most.

Škola tambure u Czinu

JU Dom kulture Cazin u saradnji sa Općinom Cazin i Udruženjem "Cazinski tamburaši" pokreće školu obuke sviranja na tamburi, sa ciljem da se održi i nastavi nadaleko poznata tradicija legendarnog tamburaškog orkestra, ali i tradicija prisustva tambure na ovim prostorima.

Vrlo važan dio naše lokalne kulture, ali i tradicije ovih prostora ogleda se upravo u radu "Cazinskih tamburaša", koji na našoj krajiškoj muzičkoj sceni postoje već punih 35 godina. Razlog zbog kojeg je općina Cazin pokrenula ovaj projekat, leži u činjenici da je ovo udruženje došlo u situaciju mogućeg izumiranja, zbog nedostatka mlađeg kadra koji bi nastavio tradiciju ovog, nadaleko poznatog, tamburaškog orkestra.

U skladu s tom idejom, gospodin Senad Tatarević, predsjednik ovog udruženja, pristao je obučavati sve zainteresirane građane, starije od 11 godina. Projekat je zamišljen kao ozbiljna aktivnost i detaljno je razrađen kroz periodične planove obuke, kontinuirane časove i javno predstavljanje uspješnih polaznika.

Otvorena izložba Husnije Topića

Kraj kulturnih dešavanja u općini Cazin za 2009. godinu obilježen je postavkom izložbe "Dokumenti vremenu" cazinskog slikara Husnije Topića. Već nekoliko godina ovaj vrsni krajiški slikar nije izlagao u rodnom Cazinu, pa je ovo bio posebno pripreman događaj. Riječ je o djelima slikara i profesora koji su istinski dokumenti vremenu i prostoru, spoj prošlosti sa sadašnjicom.


O djelu Husnije Topića govorio je akademski slikar Ahmet Ibukić, koji je naglasio da je Husnija uglavnom inspirisan poznatim likovima krajiške epike, odnosno nečim što je vezano za Cazin, Cazinsku krajinu i Bosnu.

Sam Topić nije krio zadovoljstvo što se upravo njegovom izložbom završava kalendar kulturnih dešavanja u 2009. godini i otkriva razlog zbog kojeg se postavka naziva "Dokumenti vremenu": "Uvijek se historija ponavlja, odnosno ono što je bivalo u jednom vremenu prenosi se u neko drugo vrijeme, može da se njeguje u tom vremenu ili da se ponaša u prirodnom skladu... Ova izložba i slike predstavljaju način razumijevanja svih događanja oko mene samog."

"Riječ je o našem vrsnom sikaru i umjetniku, jednom od rijetkih čiji kvalitet i prepoznatljivost ostaju konstantni i vremenski lako mjerljivi. Našem Husniji smo uvijek pružali nesebičnu podršku, što je rezultiralo današnjom dobrom saradnjom i međusobnim uvažavanjem", riječi su načelnika OGREŠEVIĆA koji je službeno otvorio izložbu.



Godina 2010 / Februar / Broj 4



Promocija knjige "Mine, prepreka razvoju BiH"

U Domu kulture naše općine, 18. januara 2010. godine sa početkom u 18 sati održana je promocija knjige "Mine", autora Fadila Hasanagića. Riječ je o djelu koje tretira utjecaj mina na pronalazak masovnih grobnica i ekshumaciju istih. Poseban



značaj se odnosi na humanu dimenziju procesa deminiranja, koji u prvi plan stavlja čovjeka-deminera. Promotori knjige su gospoda: Husein Kličić, predsjednik CK USK, prof.dr.sci. Sulejman Kendić i mr.sc. Mujo Begić.

Autor djela je general Hasanagić, porijeklom iz Bosanske Krupe. Vojnu akademiju završio je u Beogradu. Nakon penzionisanja, osnovao nevladinu organizaciju za humanitarno deminiranje. Objavio je više stručnih radova i knjige "Put do povratka" i "Minski rat u BiH". Trenutno živi u Bihaću.

Izložba fotografija "Istanbul-the timeless city"

U Domu kulture općine Cazin 27.01.2010. godine otvorena je izložba fotografija mladog umjetnika-fotografa, Amera Kapetanovića. Riječ je o umjetniku savremenog pristupa, koji je rođen u Sarajevu 1973. godine, gdje živi i radi kao profesionalni fotograf. Bavi se umjetničkom, reportažnom, dokumentarnom, tehničkom i komercijalnom fotografijom, uključujući i licenciranje fotografija za razne namjene klijenata i prodaju reprodukcija umjetničkih fotografija. Saraduje sa nekoliko dizajnerskih i marketinških agencija, arhitektonskih biroa i novinskih redakcija. Umjetničkom fotografijom se bavi kako bi njom prenio svoju viziju svijeta oko sebe, a komercijalnom kako bi mogao živjeti i raditi ovu prvu.

Do sada je izlagao na preko 100 izložbi u 14 zemalja svijeta, od čega je 12 samostalnih. Na njima je nagrađivan za pojedinačne fotografije i kolekcije fotografija. Za rad "Venecijanska priča" 2006. godine dobio je nagradu "Collegium Artisticum 2006" koja se dodjeljuje svake godine jednom fotografu, članu ULUPUBIH. U Asocijaciji za umjetničku fotografiju BiH (Foto savez) ima strukovno zvanje kandidat majstora fotografije i obavlja dužnosti potpredsjednika FIAP Liaison Officera za BiH.

Fotografije ove izložbe nastale su na ulicama grada Istanbula 2007. i 2008. godine. Predstavljaju nepresušan izvor energije i života i zasigurno nikog ne ostavljaju ravnodušnim.



Atmosfera na svečanom otvorenju u Domu kulture bila je upotpunjena riječima likovnog umjetnika i kritičara, koji je ovu izložbu opisao na neskikadašnji način. "Amer svojom fotografijom Istanbula slika njegovu dušu koja je svevremena. Odgovara 50-tim godinama 20. st, ali i našem današnjem vremenu. To je ljepota grada nekadašnje imperije, kojoj smo i mi pripadali", rekao je, između ostalog, gospodin Sead Emrić. Njegovo obraćanje je, zapravo, bilo svojevrsno iznenađenje našem autoru, koji, naravno, nije krio oduševljenje zbog svega izrečenog.

Izložbu je otvorio načelnik Ogršević, koji je ovom prilikom istaknuo važnost rada na stvaranju ambijenta kontinuirane kultivacije naših prostora.

Kao zahvalnicu za gostoprimstvo u našem Cazinu, Amer je načelniku Ogrševiću uručio fotografiju starog grada Ostrožca, koja je nastala 2004. godine i do sada je obišla veliki broj izložbi u zemlji i inostranstvu.

"Ne igraj na Engleze" u Cazinu

U Domu kulture Cazin održana je predstava "Ne igraj na Engleze", tuzlanskog teatra "Mungos", koju su naši sugrađani imali priliku vidjeti u utorak, 01.12.2009. godine. Riječ je o komediji, koja se bavi životom trojice muškaraca u ranim tridesetim godinama koji na teletekstu po cijeli dan prate rezultate fudbalskih utakmica, a glavne uloge tumače Dragan Pirić, Ademir Hogić i Šaban Mujkanović. Režiju potpisuje Slobodan Ćustić (publici poznat po glavnoj ulozi u filmu "Kuduz").

Baveći se pomnim posmatranjem teleteksta, pravljjenjem precizne strategije kako da se na utakmicama engleske lige zaradi što više novca i organiziranjem rituala praćenja rezultata, ova tri momka su zaboravila da, zapravo, žive svoj život. Pošto je uvijek neko drugi kriv za probleme koji ih prate, pošto je u Bosni nemoguće "živjeti" i pošto se sve to može zaboraviti uz konzervu piva i tiket,

oni su na taj čuveni komadić papira položili ne samo svoj novac, već i svoje dvadesetosmogodišnje prijateljstvo.



Članovi ovog teatra su vrlo mlada ekipa, koja je svojim nesebičnim kulturnim radom i umjetnošću već prepoznata kao veliko osvježenje na glumačkoj sceni u BiH.

Istog dana su održane dvije predstave za učenike II Srednje škole u jutarnjem i popodnevnom terminu, a u večernjim satima predstava je prikazana građanima općine Cazin.

Svečanost povodom nove hidžretske godine



Medžlis IZ Cazin i Općina Cazin bili su organizatori i pokrovitelji programa koji je upriličen povodom nove 1431. godine po Hidžri. Puna sala Doma kulture dokaz je da postoji veliki interes građana za ovakve svečane događaje.

Na samom početku, prisutnima su se igrokazom predstavili polaznici mektebske nastave džema'ata Prošići, koji su na ovaj interesantan način pokušali prikazati sam tok i poruke Hidžre. Program su i ovaj put upotpunili melodični zvuci Hora MIZ Cazin sa lijepim ilahijama.

U svom pozdravnom govoru glavni imam Medžlisa IZ Cazin, Said ef. Mujakić, naglasio je važnost ovakvih

skupova. "Ovo je prilika da se podsjetimo kako je bilo učesnicima ovog velikog događaja u povijesti muslimana i kakve to implikacije ima na današnje muslimane i njihovu svakodnevicu", riječi su ef. Mujakića.

Kao jedan od domaćina, prisutnima se obratio i općinski načelnik Nermin Ogršević. "Živimo u vremenu velikih izazova za koje treba naći adekvatna rješenja, a upravo ovi događaji nas podsjećaju da vodimo brigu jedni o drugima, da se oslanjamo jedni na druge i da rezultati sigurno neće izostati", istaknuo je načelnik Ogršević.

Kao gost predavač, prisutnima se obratio i prof. dr. Fuad Sedić, koji je govorio o značaju i mjestu Hidžre u životu muslimana.



"Finansiranje lokalnog razvoja"

U organizaciji UNDP-a, a u okviru Regionalnog projekta "Jačanje kapaciteta za pružanje javnih usluga – put ka EU integracijama" dana 3. i 4. decembra 2009. godine u Sarajevu je organiziran skup na temu "Finansiranje lokalnog razvoja: studija slučaja Grada Rijeke" u kojem su učešće uzeli predstavnici iz dvadesetak gradova i općina, područja zapadnog Balkana (Albanije, Bosne i Hercegovine, Hrvatske, Makedonije i Srbije). Na poziv UNDP-a iz Hrvatske, učesnici iz Bosne i Hercegovine bili su predstavnici općina Cazin, Gračanica i Srbac.

U okviru ovog događaja sudionicima su predstavljene modaliteti i rješenja za finansiranje lokalnih projekata, razmatrana su pitanja fiskalnih kapaciteta jedinica lokalne samouprave, kao i rješenja problema ograničenja njihovog zaduživanja, s naglaskom na slučaj, iskustva i uspjehe postignute u Gradu Rijeci koji je prepoznat kao jedan od najboljih primjera upravljanja gradom i iznalaženja rješenja u finansiranju lokalnog razvoja.

Načelnik Ogršević je iskoristio ovu priliku za otvoreni razgovor sa predstavnicima šire regije i razmjenu iskustava u finansiranju lokalnog razvoja.



Izložba Halide Emrić u Zagrebu



U Zagrebu je otvorena izložba keramičkih radova umjetnice Halide Emrić pod nazivom "Una iz mog sna". Riječ je o izložbi koja je obišla preko 20 gradova u BiH i ocijenjena je kao jedinstven izričaj i savremeno oplemenjivanje rada na keramici. Halida je umjetnica koja većinu svog rada posvećuje Krajini, Krajišnicima, a ponajviše Cazinu i njegovim stanovnicima.

Voditeljica Bosanskog kulturnog centra u Zagrebu, gospođa Minka Ljubijankić, izložbu je organizirala na visokom nivou uz veliki broj uzvanica iz zagrebačkog novinarskog, akademskog i kulturnog miljea. Najveći broj posjetilaca dolazi, svakako, iz naših krajeva, a riječ je o ljudima koji već niz godina žive i rade u Republici Hrvatskoj. Uvodnom riječi goste je pozdravio i ambasador BiH u Hrvatskoj, Nj. E. Vladimir Raspudić.

Izložbu je svečano otvorio načelnik općine Cazin, kao pokrovitelj ove manifestacije. "Drago mi je da naši umjetnici ruše sve barijere, granice i nesporazume kroz umjetnost i umjetnički rad. Drago mi je da smo mi dio toga kroz podršku u realizaciji ove izložbe i drago mi je da Halida prenosi duh krajiške tradicije i kulture i van granica BiH", rekao je, između ostalog, načelnik Ogršević u svom obraćanju prisutnima.

Načelnik Ogršević je ujedno i jedan od onih ljudi kojima porodica Emrić duboko i srdačno zah-



valjuje na velikoj podršci u svom radu. "Naglašavam da dio uspjeha mojih izložbi pripada općini Cazin i načelniku Ogrševiću, zbog čega ću se uvijek osjećati dijelom kao Cazinjanka", riječi su gospođe Emrić.



Formiran gradski ansambl "LIRA"



Općina Cazin je u saradnji sa Domom kulture pokrenula projekat formiranja ženskog gradskog ansambla. Osnovan je na inicijativu općinskog načelnika potaknutog entuzijazmom nekolicine nastavnica i učiteljica O.Š. "Cazin I" i njihove želje da se kvalitativno uključe u kulturni život naše općine. Voditelj ove raspjevane grupacije je nastavnik muzičkog obrazovanja, gospodin Redžan Durić. Ono što je bitno naglasiti jeste da nastavnik Durić ima veliko iskustvo i značajna postignuća kada su u pitanju horska pjevanja, jer su mnoge generacije učenika prošle kroz njegovu muzičku naobrazbu i ujedno učestvovala na domaćim horskim takmičenjima. Gradski ansambl će u početku djelovati u okviru Doma kulture i imaće prvenstveno promotivni karakter.

Cilj ovog programa jeste obogaćivanje kulturnog života, organizovano djelovanje i podrška razvoju muzičke kulture na ovim prostorima. Njihova je želja postati profesionalna muzička ekipa, koja će svojim pjevanjem povezivati građane naše općine kroz ljepotu muziciranja i pjevanja, oplemenjivanje kulturnih dešavanja i

predan rad na muzičkoj kultivizaciji mladih naraštaja. Nakon nekoliko inicijalnih nastupa ove vokalne grupe, formiran je ansambl pod nazivom "LIRA", kome se priključio značajan broj novih članica, nastavnica, prosvjetnih radnica, pedagoginja, studentica pa čak i domaćica. **Pozderac Dževada, Delalić Haseda, Bajramović Edita, Hadžić Sačime, Durić Rasema, Ikić Zuhra, Mujić Sanela, Toromanović Hermina, Toromanović Lejla, Hadžić Đemila, Mustedanagić Mersa, Kapić Rahmana, Misaljević Bejzada, Tatarević Alma, Pozderac Indira, Škrlec Emina, Šakonjić Muhiba i Pjanić Merima**, imena su vokala koji nas svaki put oduševe svojim nastupom. Autorski tim općinskog Infobiltena posjetio je ansambl "Lira" u prostorijama O.Š. "Cazin I" i prisustvovao jednoj od njihovih redovnih sedmičnih proba. Zaključili smo da ove divne glasove zaista vrijedi podržati u namjeri da budu dio naše muzičke scene.

Iskreno se nadamo da će ovaj ansambl doživjeti veliku podršku javnosti i da će biti prepoznat kao značajna odrednica muzičkog stvaralaštva općine Cazin.



S obzirom da su prvi mjeseci nove godine uvijek rezervisani za pripremanje izvještaja prethodnih perioda i planiranje budućih, osvrnućemo se na neka pitanja u vezi poljoprivredne proizvodnje i poticaja u ovoj oblasti. Razlog plus za bavljenje ovom tematikom pronašli smo u činjenici da veliki broj našeg stanovništva živi upravo od poljoprivrede i da smo i njima dužni nekoliko informacija u vezi sa realizacijom plana za ovu oblast u Službi za razvoj i poduzetništvo naše općine.

Uvođenjem registracije poljoprivrednih gazdinstava i poljoprivrednih klijenata počinje reforma poljoprivredne politike kojom je cilj postići temeljite promjene u odnosu na prijašnji sistem potpora u poljoprivredi. To će biti urađeno kako bi dobili što kvalitetniju bazu podataka, izbjegli svaki vid improvizacije i u idućem trogodišnjem razdoblju mogli kvalitetnije planirati smjernice razvoja poljoprivredne proizvodnje.

Ukupno u poljoprivredni sektor na području općine Cazin kao budžetski izdatak plasirano je 328.909,58 KM, što je trostruko više u odnosu na realizaciju prethodne godine (subvencioniranje troškova proizvedenih količina kravljeg mlijeka u kooperaciji, plastenička proizvodnja, proizvodnja jagodičastog voća, subvencioniranje troškova uzgoja pčelinjih društava, subvencioniranje troškova obaveznog označavanja i upisa u registar ovaca, koza itd.)

U saradnji sa stručnim institucijama, zavodima i nevladinim organizacijama organizovano je 14 stručnih predavanja i stručnih debata sa aktualnom problematikom iz poljoprivrede, od kojih je 8

pripremljeno uz međunarodno učešće, a prisustvovalo im je oko 1.000 poljoprivrednika. Organizirana je i obuka proizvođača mlijeka a kroz Projekat "IFAD – IV", obuhvaćeni su gotovo svi držaoci laktofriz mjesta na području općine Cazin. Prema podacima kompanije Meggle, općina Cazin je i dalje vodeća u proizvodnji mlijeka. Samo u protekloj godini otkupljeno je 8.265.287 litara mlijeka na području naše općine od strane ove mljekare.

Kada je u pitanju proljetna sjetva na području općine Cazin došlo je do smanjenja sjetve žitarica, ali i do povećanja sjetve povrtlarskih kultura. S druge strane, jesenju sjetvu je obilježio neznatan pad usjeva svih kultura. Međutim, pored svega na osnovu statističkih podataka Kantonalnog ministarstva poljoprivrede, vodoprivrede i šumarstva, općina Cazin i dalje prednjači po zasijanim površinama u odnosu na ostale općine USK-a. Očekivati je da će se ovaj poljoprivredni resurs racionalnije i efikasnije iskoristavati i u narednom periodu.

U proizvodnji se u većoj mjeri uvodi proizvodnja sitnog jagodičastog voća (malina i jagoda) na komercijalnoj osnovi. U ovoj godini poticajima je obuhvaćeno 91 dunum nasada malina i jagoda, 10 dunuma nasada jabuka i 3,5 dunuma nasada šljiva.

Općina intenzivno radi na edukaciji u saradnji sa ostalim organizacijama, službama poljoprivrednih proizvođača, a akcenat je naročito stavljen na držaoce grla u svrhu poboljšanja uzgoja, poboljšanja ishrane, povećanja mliječnosti i produktivnosti, kao i poticanje na udruživanje u zadruge, a isto tako na edukaciji poljoprivrednih proizvođača voćara u svrhu unapređenja ovakvog vida proizvodnje.

Ovdje još ističem unapređenja u oblasti pčelarstva kao jedne od strateških grana poljoprivrede na našim prostorima, a koja iz godine u godinu donose velike rezultate građanima općine Cazin. U tu svrhu smo izdvajali sredstva za poticaje pčelarima, podržali projekte brendiranja kestenovog meda, organizirali Malu školu pčelarstva, odali priznanja našim pčelarima, opremili prostorije njihovog udruženja i aktivno radimo na promociji pčelarstva i pčelarskih proizvoda u BiH i inozemstvu.



Općina Cazin

1. MART

DAN NEZAVISNOSTI BOSNE I HERCEGOVINE

Svim građanima općine Cazin čestitamo Dan nezavisnosti Bosne i Hercegovine



Tehnički podaci

Izdavač: općina Cazin

Urednik: Irma Alićajić, dipl.pol.

Autorski tim:

Mirhad Pjanić, dipl.ing.maš.

Irma Alićajić, dipl.pol.

Hamdija Ljubijankić, prof.

Suad Rošić, dipl.ecc

Emir Beširević dipl.ing.arh.

Lektor: EVRON d.o.o. Banja Luka

Dizajn: EVRON d.o.o. Banja Luka

Štampa: GRAFIS d.o.o. Cazin

www.opcinacazin.com, e-mail: op.cazin@bih.net.ba, opcina.bilten@gmail.com